




BILTEN

AGENCIJA ZA PREDŠKOLSKO OSNOVNO I SREDNJE OBRAZOVANJE

juli - septembar 2023. godine





Dragi eTwinneri,

nadamo se da su se vaše tijelo i vaš um napunili pozitivnom energijom i dobrim vibracijama te da smo svi zajedno spremni za početak nove školske godine. Pomalo i jeste privilegija da svake godine ulazimo u nešto „novo“ s mišlju da znamo kako i na koji način učiniti ovu školsku godinu još posebnijom i još kvalitetnijom, u smislu unapređenja kvaliteta nastavnog procesa, ali i u smislu unapređenja našeg profesionalnog razvoja.

Kao nastavnicima, cilj nam je odgajati i obrazovati naše učenike. Cilj je da ih svake školske godine pripremimo da budu spremni za naredne nivoe obrazovanja, da svoje znanje i vještine koriste u svrhu svog napredovanja. Na kraju, cilj nam je, prije svega, da svi naši učenici postanu dobri i vrijedni ljudi, uspješni u poslovima za koje se odluče ili za koje dobiju usmjerena tokom svog školovanja.

Izazovi koji se nalaze pred nama, kao prosvjetnim radnicima, zaista su ogromni. Potrebe učenika, tržišta rada neprestano se mijenjaju te se u skladu sa svim tim promjenama moramo i mi mijenjati i neprestano prilagođavati i unapređivati naša trenutna znanja, vještine i kompetencije kako bismo o(p)stali u trendovima savremenog života.

Zbog brzih promjena nastaje i veliki broj pitanja. Svako **zašto** ima i **svoje zato**, pa ćemo ovogodišnju čestitku posvetiti pitanju: **Zašto** inovativnost i kreativnost u obrazovanju?

Zato što bi bilo dobro da nam u ovoj školskoj godini putokazi budu usmjereni prema eTwinning godišnjoj temi „Inovativnost i kreativnost u obrazovanju“.

Zato što je duh odgoja i obrazovanja o inovacijama otvorenost za gledanje problema novim očima i njihovo rješavanje na različite i nove načine.

Zato što trebamo priznati da nemamo sve odgovore i da smo otvoreni za nove pristupe za poboljšanje nastavnih metoda s inovativnim strategijama učenja i podučavanja.

Zato što je u posljednje vrijeme i u našoj nastavnoj praksi veoma zastupljena riječ inovativnost.

Zato što inovativnost znači napraviti promjene ili učiniti nešto na neki novi, drugačiji način.

Zato što ne morate nešto izumiti da biste bili inovativni jer INOVATIVNOST je utkana u kreativnost, slobodu, razvoj, otpornost i prilagođavanje!

Zato što prihvatanjem inovativnosti u odgoju i obrazovanju podstičemo kritičko mišljenje, osjećaj za avanturu i otvorenost za prilagođavanje, što će našim učenicima biti samo odskočna daska za nastavak školovanja.

Zato što će ovakav način rada pružiti našim učenicima potrebne alate za suočavanje s izazovima budućeg radnog mjesta.

Zato što će im dati samopouzdanje i vještine za nastavak prilagođavanja u ovim nepredvidivim situacijama 21. vijeka.

Zato što ovogodišnji katalizator promjena treba da bude INOVATIVNOST!

Na kraju, **zato** što samo dobro osposobljeni nastavnici, profesionalci i refleksivni praktičari -nastavnici koji su spremni na prilagođavanje, promjene, kontinuirani profesionalni razvoj i cjeloživotno učenje, mogu biti garant da svako ZAŠTO IMA I SVOJE ZATO, i zato što samo takvi nastavnici mogu dati rezultat kvalitetnog odgoja i obrazovanja!

Dragi nastavnici/eTwinnersi, nastavite postavljati, ali i odgovarati na pitanja koja vam drugi postavljaju. Nastavite tražiti i pronalaziti moguća rješenja. Nastavite svoju misiju kvalitetnog učenja i podučavanja i smatrajte se toliko vrijednim i snažnim u postavljanju jedinstvenih formula ili recepata, mogućih dijagnoza koje će doprinijeti unapređenju nastavnog procesa u Bosni i Hercegovini.

Na tom putu uspjeha ne libite se tražiti pomoć, podršku i saradnju. Dijelite svoja znanja i vrline, jer samo **ZAJEDNO** možemo naše snove pretvoriti u stvarnost, a budućnost ove zemlje učiniti dostojnom za nas i naše buduće naraštaje!

Sretan početak 2023/24. školske godine!

Budite nam zdravi, sretni i uvijek eTwinnerski raspoloženi!!

Uz vas i u ovoj školskoj godini,

eTwinning tim BiH

Godišnja tema eTwinning za 2024. godinu: Dobrobit u školi

05.09.2023 | [Erasmus+](#), [eTwinning](#)



eTwinning sa zadovoljstvom predstavlja Godišnju temu za 2024. godinu, „Dobrobit u školi“.

U postupku analize **Godišnje teme Inovacije i obrazovanja** za 2023. godinu, eTwinning se već dotakao teme dobrobiti. Uz sve veće priznanje ključnog utjecaja dobrobiti na ishode učenja učenika i općenito zadovoljstvo životom, eTwinning ide korak dalje. Godišnja tema za 2024. godinu teži da edukatorima omogući da istraže i integrišu **pristup dobrobiti i mentalnom zdravlju na nivou cijele škole** u predškolskom, osnovnoškolskom, srednjoškolskom obrazovanju i IVET-u (početnom usmjerenom obrazovanju i obukama).

Obrazovanje se ne svodi samo na podučavanje učenika znanjima i vještinama, nego se sastoji i iz omogućavanja pristupa sigurnom okruženju za napredak, učenje i pojedinačni razvoj. Škole nisu samo mjesta za učenje, već ujedno djeluju kao sredine od važnosti za društveni i emotivni razvoj mladih. Djeca i mladi provode većinu svog vremena u školi i stoga škole igraju važnu ulogu u promociji i očuvanju njihove dobrobiti. Učenici koji se osjećaju sigurnim, podržanim i integriranim u svoje školske sredine će vjerovatnije napredovati na akademskom i ličnom planu. Više su uključeni u postupak učenja, razvijaju zdrave odnose s kolegama i nastavnicima i bolje su pripremljeni da rješavaju izazove i prilike u životu izvan škole.

Također treba prepoznati da je dobrobit nastavnika ključna za kreiranje zdravih, sigurnih i pedagoških sredina za podučavanje.

Kako bi se osiguralo da obrazovni sistemi budu **nepriistrasni i inkluzivni**, eTwinning će promovirati stav da svi imaju mogućnost da ostvare svoj potencijal, bez obzira na lične okolnosti (spol, rodni identitet, nacionalnost, vjeroispovijest, sposobnosti) i porodične, kulturološke i društveno-ekonomske pozadine svih nastavnika i učenika.

Za sve članove škole je važno da se osjećaju zaštićenim od predrasuda, nasilja, zlostavljanja i vršnjačkog nasilja i da imaju osjećaj da se mogu razvijati. Od škola se očekuje da budu sigurno okruženje u kojem se svi – učenici, učitelji, roditelji i edukatori – osjećaju dobrodošlim i cijenjenim, te da se mogu slobodno izraziti bez diskriminacije.

Iz tog razloga će se eTwinning također fokusirati na vršnjačko nasilje, kao složeno pitanje koje često cilja pojedince na osnovu spola, seksualne orijentacije, nacionalnosti, religije ili sposobnosti. To može doprinijeti razvoju neprijateljskog okruženja za marginalizirane grupe. Stoga se specifičan naglasak stavlja na ponudu obuke nastavnicima o načinima rješavanja vršnjačkog nasilja i razvoja empatije kod učenika.

Kako biste se upoznali s Godišnjom temom za 2024. godinu – Dobrobit i pripremili se za uzbudljivu predstojeću godinu, preporučujemo vam da pročitate sljedeće:


- [Pathways to School Success – European Commission](#) (Put ka uspješnoj školi – Evropska komisija)
- [LifeComp: The European framework for the personal, social and learning to learn key competence](#) (LifeComp: Evropski okvir za lični, društveni razvoj i učenje kako bi se ostvarile ključne kompetencije)
- [Promoting supportive learning environments and supporting well-being at school – Publications Office of the EU \(europa.eu\)](#) (Promocija dodatnih sredina za učenje i podrška dobrobiti u školama – Ured za publikacije EU (europa.eu))
- [Social and emotional learning and academic achievement in schools – Publications Office of the EU \(europa.eu\)](#) (Društveno i emotivno učenje i akademski rezultati u školama – Ured za publikacije EU (europa.eu))
- [What can schools do about bullying? – Publications Office of the EU \(europa.eu\)](#) (Šta škole mogu učiniti protiv vršnjačkog nasilja? – Ured za publikacije EU (europa.eu))
- [What motivates children who bully, and can they change? – Publications Office of the EU \(europa.eu\)](#) (Šta motivira djecu koja se ponašaju nasilnički i mogu li se promijeniti? – Ured za publikacije EU (europa.eu))
- [Resilience in schools – Publications Office of the EU \(europa.eu\)](#) (Ustrajnost u školama – Ured za publikacije EU (europa.eu))




eTwinning



eTwinning vijesti:

 Održana godišnja radionica profesionalnog razvoja za eTwinning nacionalne/državne organizacije za podršku eTwinningu 05.07.2023 | [Erasmus+](#), [eTwinning](#)

 U Berlinu je, u periodu od 27. do 29. juna 2023. godine, održana godišnja radionica profesionalnog razvoja posvećena eTwinning nacionalnim/državnim organizacijama za podršku eTwinningu.

Tokom ovog trodnevnog događaja održane su brojne radionice koje su imale za cilj aktualizirati različite eTwinning teme i pokriti aspekte eTwinninga, uključujući: razvoj ESEP platforme i korisničke podrške eTwinnerima, organizaciju online i onsite eTwinning događaja, eTwinning ambasadore, eTwinning škole, oznake kvaliteta i slično.



Na radionicama su tematizirani izazovi s kojima se suočavaju državne/nacionalne organizacije za podršku eTwinningu i predstavljeni su konkretni primjeri dobrih praksi za prevazilaženje teškoća. Godišnja radionica za profesionalni razvoj NSO/DOP-a je bila mjesto susreta, prezentacije primjera dobre prakse i prilika za učenje i razmjenu ideja.



eTwinning razglednica

I ove godine imali smo priliku dobiti eTwinning razglednice uvijek kreativnih i inovativnih eTwinnera Bosne i Hercegovine. Sunce i dobro raspoloženje su vjerovatno bili energetske punjači za sve naše eTwinere! Pristigle razglednice su objavljene na našoj Facebook stranici u vidu kolaža.

<https://www.facebook.com/eTwinningbih/videos/1773400733111558>



eTwinning ljetnji kamp

Državna organizacija za podršku eTwinningu Bosne i Hercegovine je u Konjicu, u periodu od 16. do 18. augusta 2023. godine, održala prvi eTwinning ljetni kamp za buduće eTwinninge i eTwinning početnike.

Program kampa je započeo 16. 8. 2023. godine organizacijom trećeg sastanka DOP i eTwinning ambasadora, koji je bio posvećen aktuelnostima i planovima eTwinning tima u BiH do kraja kalendarske godine.

Kamp „Ljetna eTwinning inspiracija – moja profesionalna motivacija“ je okupio 47 motivisanih kandidata koji žele razviti i usavršiti znanja o eTwinning zajednici i eTwinningu općenito. Učesnici kampa su nam stigli iz 21 lokalne zajednice u Bosni i Hercegovini.

Programom ljetnog kampa osigurane su edukativne aktivnosti o prirodi i mogućnostima ESEP portala i eTwinning projekta te prilike za dobru zabavu, uz aktivnosti međusobnog upoznavanja, saradnje i povezivanja odgajatelja, učitelja, nastavnika i direktora odgojno-obrazovnih ustanova kroz registraciju na platformu i pokretanje eTwinning projekata (koji će im omogućiti povezivanje s ustanovama i kolegama širom Evrope).



Državna organizacija za podršku eTwinningu i eTwinning ambasadori su održali niz radionica na različite aktuelne eTwinning teme, od kojih izdvajamo: **Šta je eTwinning?**,

Inspirativno i kreativno okruženje za učenje, Prvi koraci u eTwinningu – kako se registrovati?, Kvalitet eTwinning projekata – kriteriji kvaliteta, Razvoj kreativnosti kroz igru, Sigurnost i zaštita podataka u eTwinningu i Izradimo reklamu za eTwinning kamp.

Također, pažnju prisutnih su izazvale prezentacije istaknutih i nagrađivanih eTwinnera nastavnika, koji su nesebično dijelili ideje, iskustva, znanja i primjere dobre prakse na teme: **Moje profesionalno putovanje s eTwinningom, Primjeri nagrađivanih EQL projekata, Primjena web-alata i dr.**



Inspirisani i motivisani, osnaženi novim idejama, sigurnim okruženjem za mogućnosti profesionalnog razvoja i cjeloživotno učenje, inovativnim prilikama za povezivanje nastavnika i učenika pomoću informacijsko-komunikacijskih tehnologija i web-alata kroz učešće u međunarodnim projektima, dočekujemo spremno novu školsku/pedagošku godinu! Sretno svima!



eTwinning obuka „Učiti i podučiti uz eTwinning“, u okviru programa stručnog usavršavanja nastavnika osnovnih i srednjih škola u Srednjobosanskom kantonu.

Na poziv nadležnih obrazovnih vlasti Srednjobosanskog kantona, Državna organizacija za podršku eTwinningu je održala pet eTwinning obuka u okviru programa stručnog usavršavanja nastavnika osnovnih i srednjih škola na području ovog kantona. Prisutne su pozdravili i kratko se obratili **Nermin Mehremić**, direktor škole, i **Selma Mahmić**, zamjenica predsjednika Kantonalnog stručnog aktiva za osnovne škole koje NPP realiziraju na bosanskom jeziku.



Predstavnici **DOP-a** su zahvalili **Ministarstvu obrazovanja, nauke, kulture i sporta Srednjobosanskog kantona** na inicijativi da se pred početak nove školske godine organizira eTwinning obuka, te učesnicima poželjeli dobrodošlicu u evropsku zajednicu škola i evropsku zajednicu odgojno-obrazovnih profesionalaca s otvorenim članstvom u događajima i prilikama za kontinuirani profesionalni razvoj i cjeloživotno učenje koje nudi projekt **eTwinning**.

eTwinning obuke su vodile eTwinning ambasadorice **Lejla Hujdur** i **Azra Šoše** i istaknuta članica eTwinning zajednice **Selma Mahmić**, uz podršku ostalih članova eTwinning tima.

eTwinning obuke „Učiti i podučiti uz eTwinning“ i praktične prezentacije registracije na eTwinning (ESEP) platformu su realizirane za ukupno 124 učesnika, nastavnike predmetne nastave u osnovnim školama i profesore iz srednjih škola 29. augusta, a za nastavnike/učitelje razredne nastave 30. augusta u Kiseljaku, OŠ „Kiseljak 1“ Bilalovac u Kiseljaku.

Učesnici obuka su upoznati s mogućnostima eTwinninga koji svojim članovima omogućuje učenje i povezivanje s kolegama putem pokretanja zajedničkih projekata i stručnih događaja, dijeljenjem resursa, upotrebom web-alata za rad s kolegama i učenicima, učešće na domaćim i međunarodnim obukama i događajima uživo ili online, a u radioničkom dijelu obuke su se registrirali na eTwinning platformu i u članili u **eTwinning sobu** pod nazivom „[eTwinning obuka: „Učiti i podučiti uz eTwinning“](#)“, koja je kreirana za potrebe ovog događaja i administrirat će se u svrhu daljnje saradnje, razvijanja projektnih ideja i registracije ostalih zainteresiranih za eTwinning zajednicu.



Međunarodni eTwinning događaji

U Slovačkoj (Bratislava) će od 28. do 30. septembra biti organizovan eTwinning međunarodni događaj **Unapređenje učenja i inovacija s vještinama za budućnost!** Učesnice iz eTwinning-a Bosne i Hercegovine, Ljudmila Milošević i Alisa Ramić - Dudić imat će jedinstvenu priliku saznati više o inovativnim nastavnim metodama, pedagoškim pristupima i tehnološkim alatima za unaprjeđenje kvaliteta nastave.

Za mnogo dobrih bilten senzacija!

(slijedi)

Mjesečna doza eTwinning vibracija!



Ono što je važno u svim odgojno-obrazovnim ustanovama su nastavnici. Sva istraživanja pokazuju da su najveće tajne zvjezdanih ocjena i uspješnih učenika upravo nastavnici. Napori da se osigura da svaki nastavnik može da podučava ometaju se upornim mitom da se dobar nastavnik rađa, a ne postaje. Heroji iz učionice poput Robina Williamsa u „Društvu mrtvih pjesnika“ ili Michelle Pfeiffer u „Opasnim umovima“ obdareni su iznimnim, urođenim inspirativnim moćima. Osim urođenosti, mi težimo i ka stalnom profesionalnom i stručnom razvoju nastavnika kao i spremnosti nastavnika da pristupe procesu cjeloživotnog učenja i napredovanja.


Pretpostavka da je sposobnost podučavanja nešto što ili imate ili nemate definitivno je pogrešna. Nastavnici treba da nauče kako da prenesu znanje i kako da pripreme učenike i njihove umove da to isto znanje prime i zadrže. Kvalitetni nastavnici postavljaju jasne ciljeve, postavljaju visoke standarde učenja i ponašanja te mudro upravljaju svojim vremenom. Koriste isprobane i testirane tehnike podučavanja kako bi osigurali da svi dječiji mozgovi rade sve vrijeme. I da konačno ta pravednost i pravičnost u svim učionicama bude na visokom nivou.

O primjeni ovih tehnika lako je govoriti, teoretizirati, ali kako sve to primijeniti u učionici? S podučavanjem, kao i s drugim složenim vještinama, put do majstorstva nije nejasna teorija, već intenzivna, vođena praksa zasnovana na znanju predmeta i pedagoškim metodama.

*Ovaj uvod posvećen je nastavnicima koji su spremni na promjene, nastavnicima koji su spremni na kontinuirano profesionalno usavršavanje, ali i nastavnicima koji se s pravom mogu nazvati profesionalcima u svom poslu. Jedan od tih briljantnih nastavnika je i naša, već dobro poznata eTwinnerica, učiteljica u **Osnovnoj školi Kiseljak 1, Bilalovac - Selma Mahmić.***

Otvorivši eTwinning profil naše učiteljice Selme, već vidimo kojim se citatom vodi: „Jedinu pravu sigurnost u današnjem svijetu čovjeku mogu pružiti znanje, iskustvo i sposobnost.“ Vidimo da je učestvovala u 48 eTwinning projekata te da je za veliki broj njih bila osnivač ili suosnivač.

Osim toga, ova izvanredna učiteljica je na izuzetan način bila promoter eTwinninga kako u svojoj školi tako i u cijelom Srednjobosanskom kantonu. Njene preporuke i inicijative zasigurno su doprinijele unapređenju kvaliteta eTwinning projekata, ali i proširenju eTwinning zajednice u Bosni i Hercegovini. Učiteljica Selma je učestvovala u inicijativi da eTwinning bude vrednovan i da eTwinnersi na osnovu svoje uključenosti budu nagrađeni adekvatnim brojem bodova koje dodjeljuje nadležno ministarstvo. Selma je učiteljica koja itekako promovira svoj rad kao i rad svojih učenika, te se na osnovu tih aktivnosti u mnogim školama Evrope zna za našu Selmu, Selmine uspješne projekte, Selmine učenike, Kiseljak i Bosnu i Hercegovinu. Otvaranjem eTwinning prozora učenici su imali priliku da putuju i da uče, da svoja znanja primjenjuju i unapređuju te da svoja iskustva dijele s drugima. Mnogobrojne nagrade koje je Selma ostvarila u prethodnom periodu samo ukazuju na to da je izuzetna čast da ovakvi učitelji postoje i opstaju u Bosni i Hercegovini te da je ovo samo početak njenih velikih uspjeha.

 **Draga Selma, čast nam je i zadovoljstvo da imamo priliku nešto više čuti o Vašoj profesionalnosti u ovoj, po nama, najljepšoj profesiji na svijetu. Kako sama izreka kaže „Da je učitelj biti lako, učitelj bi bio svako“ pa slijedi pitanje i za Vas. Da li je učiteljski poziv za Vas privilegija i, ako jeste, kako biste tu privilegiju opisali?**


Podučavanje je profesija koja stvara sve ostale profesije. Biti učitelj je čast i privilegija jer imamo priliku učiti i odgajati nove generacije. Učitelj svojim đacima pruža ruku prijateljstva, dijeli lijepe i manje lijepe trenutke, savjetuje, pomaže, uči ih i prati njihov napredak.

 **Možete li nam u nekoliko rečenica opisati Vaše „prve korake“ u eTwinningu?**

Za eTwinning saznala sam putem društvene mreže, registrirala se 2021. godine i nisam ni bila svjesna koje sve mogućnosti nudi ova zajednica. U početku sam istraživala platformu, pronalazila osobe sličnih interesovanja i dodavala za kontakte, učestvovala na eTwinning događajima i pridružila se brojnim grupama. Nakon nekoliko mjeseci, poznavajući interese mojih učenika, postala sam član zanimljivih eTwinning projekata.

 **Šta Vam se u eTwinningu najviše sviđa, a šta bi se možda trebalo promijeniti ili unaprijediti?**


Sviđa mi se što je eTwinning siguran prostor za učenike i nastavnike, što mi nudi priliku za nova prijateljstva, timski rad, cjeloživotno učenje i dijeljenje dobrih praksi i ideja.

 **Vi ste neko ko je inicirao eTwinning obuke za nastavnike u Srednjobosanskom kantonu. Kakve su povratne informacije Vaših kolega nakon završene obuke? Kakve su reakcije obrazovnih vlasti na učešće i zainteresovanost ovolikog broja nastavnika?**


Da, za stručno usavršavanje nastavnika u Srednjobosanskom kantonu predložila sam temu „Kako učiti i podučiti uz eTwinning“ i zahvaljujem Ministarstvu obrazovanja, nauke, mladih, kulture i sporta SBK jer se obuka našla u Katalogu stručnih usavršavanja. Za ovo stručno usavršavanje predstavnici Ministarstva su nam prenijeli informacije da je bio veliki interes nastavnika i da je nažalost zbog ograničenog broja učesnika mnogo prijavljenih nastavnika ostalo uskraćeno upoznati se s eTwinning platformom, zato predlažu da se u skorijoj budućnosti održi obuka i za te nastavnike. Također, hvala eTwinning timu i ambasadorima za izuzetno inspirativno i motivirajuće predstavljanje platforme 29. i 30. augusta ove godine u Kiseljaku. Polaznici obuke imaju samo pozitivne komentare i sigurna sam da ćemo zahvaljujući ovoj obuci iznjedrili veliki broj eTwinnersa s prostora SBK koji će pokazati kolegama širom Evrope svoje kvalitete i dijeliti dobre prakse.

 **Kako je eTwinning uticao na Vaš profesionalni razvoj, Vašu kreativnost u učionici?**


Kroz aktivno učešće na eTwinning platformi imam priliku svakodnevno učiti i napredovati. Od kada sam postala dio ove zajednice moj rad s učenicima više nije šablonski jer sam integrirala eTwinning projekte kroz redovnu nastavu.

 **Pretpostavljamo da je svim nastavnicima, pa i Vama, najvažnije zadovoljstvo Vaših učenika cjelokupnim Vašim angažmanom. Naravno da pratite i uvidate napredak njihovog učenja i sazrijevanja, a možete li nam samo ukratko reći kakve su impresije Vaših učenika tokom njihovog učešća u eTwinning projektima?**

Moji učenici vole nove načine učenja, istraživanje i eksperimentisanje, a to im sve nude raznoliki eTwinning projekti čiji su članovi. Rado učestvuju u projektima, uživaju u zajedničkom radu s drugarima širom Evrope, vole online susrete i upoznavanje. Uključivanjem u međunarodne projekte učenici su postali samostaljniji i samopouzdaniji.

 **Uobičajeno pitanje koje postavljamo našim istaknutim eTwinnersima jeste i to šta biste preporučili nastavnicima i manje iskusnim eTwinnersima i zbog čega bi se trebali priključiti ovoj najvećoj zajednici nastavnika u Evropi?**

eTwinning je prijateljstvo, timski rad, cjeloživotno učenje i dijeljenje znanja. Kada postanete eTwinners, imate priliku biti dio besplatne i sigurne zajednice koju čine nastavnici širom Evrope s kojima dijelite iste ili slične interese, učiti i profesionalno napredovati. Vaš rad, kreativnost i inovativnost vidjet će mnogi evropski nastavnici.

 **Kada je u pitanju Vaš profesionalni rad, šta biste naveli kao Vašu profesionalnu motivaciju i na koji način uspijevate da budete u aktuelnostima obrazovnih dešavanja?**

Poslovice kaže da kad radite ono što volite, ne radite nijedan dan. Ovaj posao mora da se voli jer samo tako lakše prevazilazimo sve odgovornosti, teškoće i zahtjeve koje nosi naš posao. Kada radite nešto iz ljubavi, rezultat neće izostati. Moj najvažniji izvor motivacije su moji učenici i spoznaja da oblikujem njihov um. Biti učitelj je kreativno zanimanje koje mi pruža priliku da pozitivno utičem na druge i da nikad ne prestajem učiti, jer da bi bio dobar učitelj, moraš i sam stalno učiti.

 **Koja bi bila Vaša poruka za kraj svim našim prosvjetnim radnicima, sadašnjim i budućim eTwinnerima?**

„Ako učitelj voli samo posao, on je dobar učitelj. Ako učitelj voli učenika kao otac ili majka, on je bolji od onog učitelja koji je pročitao sve knjige ali ne voli posao, ni đake. Kad učitelj sjedini ljubav prema poslu i prema učenicima – on je savršen učitelj.“ (Lav Nikolajevič Tolstoj)

Draga Selma, bilo je zadovoljstvo razgovarati s Vama. Nadam se da će mnoge generacije, koje su imale priliku da im Vi budete učiteljica, ostvariti izvanredne rezultate u narednim nivoima obrazovanja kao i u budućem životu. Vjerujemo da će postati dobri ljudi te da će možda neko od njih krenuti Vašim profesionalnim stopama. Ono što je sigurno, svi ti učenici definitivno će pamti i vjerovatno dugo godina spominjati iskustva iz eTwinning projekata i inspirativnog rada, koje ćete sigurno još mnogo, mnogo godina provoditi u svojoj učionici. Ono što je također sigurno je i to da vjerujemo da se Vi nećete zaustavljati u svojoj učiteljskoj misiji i da će Vaša dostignuća biti inspiracija svim nastavnicima.

Jer, samo ovakvim pristupom, kvalitetnom pripremom novih nastavnika i usavršavanjem nastavnika, koji su već u učionicama, dolazi se do najvećih obrazovnih postignuća.

Pouka je jasna: Kvalitet odgoja i obrazovanja moguće je samo s kvalitetnim i uspješnim nastavnicima!



Digitalni alati za kvalitetnije obrazovanje




[Wallwisher](#) je sjajna web-stranica koja korisnicima omogućava stvaranje virtuelnih ljepljivih bilješki i njihovo postavljanje na zid. Zidovi koje možete stvoriti putem njihove web-stranice mogu biti izuzetno koristan komunikacijski alat za škole. Učenici se ne moraju prijaviti ili registrirati za korištenje Wallwishera, a vaši zidovi mogu postati privatni.

Neke moguće upotrebe Wallwishera u učionici?

Izvrstan komunikacijski uređaj gdje učenici mogu postavljati pitanja, bilo o domaćoj zadaći ili važnim konceptima iz razreda. Drugi učenici mogu odgovarati na ova pitanja ili raspravljati o temama dodavanjem vlastitih ljepljivih bilješki. Ljepljive bilješke možete pomicati kako biste mogli organizirati različita područja zida za različite ideje. Možda želite vidjeti hoće li učenici radije polagati test u četvrtak ili petak? Samo neka učenici stave svoje ime na ljepljivu ceduljicu i stave je ispod dana koji žele.

Kako tehnologija napreduje, i mi kao nastavnici prilagođavamo se ovim promjenama, besplatne web-stranice poput Wallwishera pružaju jedinstvena iskustva koja virtuelnu komunikaciju čine zanimljivijom i lakšom za upravljanje. Ako se vratite korak unatrag, Wallwisher je u osnovi objava/blog stranica na Twitteru. Razlika je u interfaceu; možete premještati i preuređivati svoje postove (ljepljive bilješke) i to je nešto više interaktivnosti za iskustvo komunikacije.

Isprobajte to već danas u svojoj učionici i postavite zid za početak kao pomoć u zadavanju domaće zadaće.



<https://www.zoho.com/show/>

<https://www.zosuccess.com/zoho-workplace/>

ZOHO Softver za saradničku prezentaciju za moderne timove

Zoho Workplace skup je aplikacija za komunikaciju i saradnju koji pruža cjeloviti skup rješenja koja ne samo da vam pomažu u saradnji, već i stvaranju i komunikaciji s vašim timovima. Zoho Workplace objedinjuje aplikacije za e-poštu, upravljanje dokumentima, prezentacije, chat i druge komunikacijske alate na jednoj platformi.

Koje su aplikacije uključene u Zoho Workplace?

Većina nastavnika koji koriste ovaj alat u nastavnom procesu smatraju ga jednostavnim za korištenje i nevjerovatna inovativna rješenja. Pomaže u osmišljavanju novih ideja i impresivnih prezentacija koje su pune dinamike i kreativnosti. Ovaj alat pomaže nastavnicima i u tome da postignu bolje rezultate u ostvarivanju svojih ciljeva u kraćem vremenu i da izgrade povjerenje kod svojih učenika.

Ovaj alat veoma lagan za korištenje, vjerovatno će postati neizbježna pomoć u pripremi nastavnih jedinica kao i u prezentiranju ideja prema kolegama i učenicima.

„Najvažnije je stalno postavljati pitanja.“

(Albert Einstein)

 **BILTEN**
AGENCIJA ZA PREDŠKOLSKO OSNOVNO I SREDNJE OBRAZOVANJE
juli - septembar 2023. godine

